



Broj: 06-04-34176-11/25
Sarajevo, 25.06.2025.godine

SKUPŠTINA KANTONA SARAJEVO **-OVDJE-**

Predmet: Izjašnjenje na zastupničku inicijativu zastupnika Šaljić Jasmina, dostavlja se

Zastupnik Jasmin Šaljić je na 23. Radnoj sjednici Skupštine Kantona Sarajevo, uputio zastupničku inicijativu prema Vladi Kantona Sarajevo, Ministarstvu za rad, socijalnu politiku, raseljena lica i izbjeglice Kantona Sarajevo i Ministarstvu za boračka pitanja Kantona Sarajevo, a koja glasi:

“Na osnovu informacija sa terena utvrđen je neravnopravan tretman ratnih vojnih invalida sa različitim kategorijama invaliditeta, a prilikom ostvarivanja prava na dječiji dodatak. Članom 55. Zakona o dopunskim pravima boraca propisano je da pravo na mjesečna novčana primanja imaju djeca ratnih vojnih invalida sa utvrđenim invaliditetom od 20 do 80%. Članom 136. Zakona o socijalnoj zaštiti, zaštiti civilnih žrtava rata i zaštiti porodice sa djecom propisano je da pravo na dodatak na djecu bez obzira na prihode pripada djetetu bez jednog roditelja ili oba roditelja, te porodici u kojoj je jedan od roditelja ili djeteta imaju utvrđen invaliditet od najmanje 90%.

U praksi to izgleda ovako. Djeca čiji roditelji imaju invaliditet od 20-80% ostvaruju pravo na dječiji dodatak u iznosu od 127,80 KM i koji je 44 KM veći od djece roditelja koji imaju invaliditet od 90 do 100% (amputirici i osobe u kolicima) čiji dodatak iznosi 84 KM. Na osnovu gore navedenog očigledno je da postoji neujednačenost/nelogičnost kod ostvarivanja istog prava (dječiji dodatak). S toga predlažem unificiranje prava bilo kod Ministarstva za rad i socijalnu zaštitu ili kod Ministarstva za boračka pitanja, te da se o ovoj inicijativi opredijeli Vlada KS uz učešće i dogovor navedenih ministarstava. Pošto se radi o vojnim kategorijama logično bi bilo da se izmjenom i dopunom Zakona o dopunskim pravima boraca propiše da pravo na mjesečna primanja imaju djeca ratnih vojnih invalida sa utvrđenim invaliditetom od 20 do 100%, djeca bez jednog ili oba roditelja u porodicama šehida, porodicama poginulih, umrlih i nestalih branioca, bez obzira na imovinski cenzus. Korisnici koji ostvare gore navedeno pravo ne mogu isto ostvariti po Zakonu o socijalnoj zaštiti, zaštiti civilnih žrtava rata, zaštiti porodice sa djecom.”

Na pokrenutu zastupničku Inicijativu dajemo slijedeće

I Z J A Š N J E N J E

Ministarstvo za boračka pitanja Kantona Sarajevo vrši upravne i stručne poslove utvrđene Ustavom, zakonom i drugim propisima u oblasti ostvarivanja prava članova porodica šehida, članova porodica poginulih, umrlih i nestalih branioca, ratnih vojnih invalida i članova njihovih porodica, dobitnika ratnih priznanja i odlikovanja i članova porodica poginulih, umrlih i nestalih dobitnika ratnog priznanja i odlikovanja, demobiliziranih branioca, dobrovoljaca, organizatora otpora, veterana, ratnih vojnih zarobljenika i lica koja su kao maloljetna stupila u Oružane snage R BiH, kao lica zaslužnih u odbrambeno-oslobodilačkom ratu sa područja Kantona Sarajevo, kao i vođenje i podržavanje aktivnosti na očuvanju tekovina odbrambeno-oslobodilačkog rata 1992-1995. godine, održavanju manifestacija i drugih sličnih projekata.

Kako je i u inicijativi navedeno dječiji dodataka za invalide sa procentom 90 i 100% se ostvaruje na osnovu Zakona o socijalnoj zaštiti, zaštiti civilnih žrtava rata i zaštiti porodice sa djecom jednom propisu, a za invalide 20-80% po osnovu Zakona o dopunskim pravima boraca-branitelja Bosne i Hercegovine ("Službene novine Kantona Sarajevo", br. 31/22, 8/24 i 13/25) (u daljnjem tekstu: Zakon), odnosno radi se o formalno potpuno nezavisnim pravima koja se nezavisno uređuju. Odredbama Zakona definisana su dopunska prava i uvjeti za ostvarivanje prava. Članom 55. Zakona propisano je pravo na mjesečna novčana primanja – dječiji dodatak djece ratnih vojnih invalida od 20 do 80% invaliditeta, a koji glasi: „(1) Pravo na mjesečna novčana primanja imaju djeca ratnih vojnih invalida sa utvrđenim invaliditetom od 20 do 80% (u daljnjem tekstu: dječiji dodatak), bez obzira na imovinski cenzus i ukoliko ovo pravo ne ostvaruje po propisima o zaštiti porodice sa djecom.

(2) Dječiji dodatak isplaćuje se djeci do završetka redovnog školovanja, a najkasnije do navršenih 27. godina života. Dječiji dodatak isplaćuje se i za vrijeme dok je dijete usljed bolesti ili liječenja spriječeno da izvršava svoje obaveze u školi, odnosno fakultetu, a najkasnije do navršenih 27 godina života.

(3) Iznos za usklađivanje visine dječijeg dodatka je 7,5% prosječne neto plaće ostvarene u Kantonu u prethodnoj godini.

(4) Iznos naknade iz stava (3) ovog člana na prijedlog ministra utvrđuje Vlada Kantona svojom odlukom najmanje jedanput godišnje, u skladu sa raspoloživim budžetskim sredstvima, pri čemu iznos dječijeg dodatka po potrebi može biti i manji uz primjenu koeficijenta za obračun. Ukoliko dođe do umanjivanja iznosa dječijeg dodatka isti ne može biti manji od onog koji je ostvaren u prethodnoj godini.

(5) Pravo na dječiji dodatak pripada djeci koja ispunjavaju uvjete za priznavanje ovog prava od prvog narednog mjeseca od dana podnošenja zahtjeva.“

Napominjemo da je pravo na dječiji dodatak za ratne vojne invalide od 20 do 80% invaliditeta uvedeno nakon što su ovi korisnici izgubili pravo na dječiji dodatak po Zakonu o socijalnoj zaštiti, zaštiti civilnih žrtava rata i zaštiti porodice sa djecom, kako bi i dalje mogli koristiti pravo na dječiji dodatak.

Ministarstvo za boračka pitanja može utjecati samo na visinu naknade po Zakonu i istu ne možemo prilagođavati-smanjivati naknadi koja se utvrđuje po Zakonu o socijalnoj zaštiti, zaštiti civilnih žrtava rata i zaštiti porodice sa djecom, kako bi i dalje mogli koristiti pravo na dječiji dodatak.

Ovom prilikom ističemo da je jedini način ujednačavanja naknade obuhvatanje svih kategorija/procenata ratnih vojnih invalida u okvir Zakona, što i jeste cilj zastupničke inicijative (uz osiguravanje dodatnih sredstava za Ministarstvo za boračka pitanja), da Ministarstvo za boračka pitanja Kantona Sarajevo podržava ovu inicijativu te ćemo nastojati izjednačiti primanja na ime



dječijeg dodatka za djecu ratnih vojnih invalida svih procenata invaliditeta kroz buduće izmjene i dopune Zakona o dopunskim pravima boraca-branitelja Bosne i Hercegovine.

S poštovanjem,



Dostaviti:

- Predsjedavajućem Skupštine Kantona Sarajevo,
- Zamjenici predsjedavajućeg Skupštine Kantona Sarajevo x3,
- Službi za Skupštinske poslove Kantona Sarajevo,
- Stručnoj službi Vlade Kantona Sarajevo,
- Zakonodavno-pravnoj komisiji Skupštine Kantona Sarajevo,
- Komisiji za boračka pitanja Skupštine Kantona Sarajevo,
- A/a.